

夜

雨

秋

燈

錄

夜雨秋燈錄卷二

天長宣 鼎瘦梅甫著

了不了道人

昔有異僧名了不了道人善風鑑求相者戶外屢常滿道人信口開河洋洋洒洒輒寄中每日得相金必以破鉢沽濁酒就市上飲之歪歪斜斜不須几案飲則滔滔滾滾如長江大河而鉢仍灑灑漱漱不爲竭飲既醉仰天自語曰了矣乎視鉢中無涓滴剩醉必歌以佛曲雜吳飲古謠陴呀呀不能辨一字歌畢又嗚嗚咽咽哀哭不了哭畢又嘻嘻哈哈狂笑不了資有餘則袖至委巷近卑田院窮兒村向空一擲阿堵物叮叮噹噹亂落如急雨衆乞丐爭攫之跌跌跣跣如三春柳絮因風滾舞頃刻了矣僧顧之一大樂也間以假髮加髡顙上梳丫髻作善財童

子志志誠誠拜菩薩或髻髮披肩作龍女娉娉婷婷捧淨水寶
瓶更盤雲髻滿插花草作趙飛燕嬈嬈娜娜掌上舞且白布裹
雙翼手揭冥錢羹飯作小寡婦上墳淒淒切切哭薰枯人有戲
之者曰阿師何不粉墨塗面作張飛霸王典韋而乃現女人身
耶則又狠狠毒毒詈曰惡奴才自家假形骸尙不得了猶欲強
人以假面目真衆生相也人怒欲飽以老拳則又飄飄蕩蕩如
駿馬下危坡疾行不可及性好與兒童嬉所到處羣小層層疊
疊圍繞之不散去偶跌坐芳草地童子爭拾碎瓦於道人頭頂
堆作小寶塔則又端端正正不爲動一日恒禪師見之喝曰咄
作和尚的甯這樣道人亦喝曰做和尚的何不這樣曰若不蓬
髮披袈裟方可這樣曰惟其蓬髮披袈裟方可這樣曰吾不許
你這樣曰我偏欲這樣曰打煞你不許這樣道人峻峻嶙嶙噴

口大呼曰打煞你不許你容不得我這樣曰我真打煞你曰人道你打煞我我還這樣我道我打煞你我還這樣恒禪師聞之合十曰公真善知識活活潑潑地一片天機領教多矣膜拜而去道人做鬼臉笑曰禪和子好打口頭禪同他說了半日昏昏沉沉的夢話他反說悟了是真近今の禪和子非我所願見的禪和子後入浙遊西湖愛其山青青水綠森石巖巖樹森然恍然若有所悟嗣後不相人惟相各寺院土木神佛嘗係何日成就何日供養悉符合言當何年倒塌損壞無神靈尙未驗真否惟某菜園社公最靈顯香火甚盛園丁乞道人相之曰明日即化去想果香火焰飛神像煨爐又登保叔塔瞰大地紅紅綠綠鶯鶯燕燕風風雨雨不禁躍起數尺墮塔下跌幾死旋甦嗣後遂不飲酒不歌不哭笑不粧婦人不與兒童嬉更不相神佛惟

終日痴痴迷迷坐水次玩游魚立層巖數飛鳥問亦信口成小
詩詩曰道人何不了了非道人功名與妻子悉是前生因何
者富何者貧撥雲一嘆天下春道人何不了了亦非道人鐘聲
和梵唄色相總非真有時笑有時嘆好個蒲團自在身道人了
不了不了了道人結舌不敢語我我稱主賓莫要喜莫要嘆空
山本來無四隣吟已跳入西湖不知所往

閨俠

邦江戲園曾演絳囊記欲筆之於書未果而翼駟稗編已載入
風雨良宵偶與客話及此事重爲編就竟大同小異亦猶之觚
牘有雪遘而蒲柳泉更有力將軍傳耳北鄉有貧家女耿湘
蓮父在時已許字范生希瓊父歿兩家俱赤貧女年及笄其母
陰有悔婚意會西賈睨女美絕倫且知書賄媒媼諷母願奉千

金納爲造室母曰婿梗奈何媼曰但得母首肯范家無立錫渠
自會以阿堵暖其心女知之痛哭不食覓死者再母曰兒卽不
自謀寧不爲母謀乎家貧若此壻貧若彼日日噉糠粃安有盈
餘養活泰水女泣曰何見得范家郎卽老死不發籍由是日夜
哭私以剪刀利刃自衛隣有解叟名星者慮釀成禍急往見范
生勸速娶生告以貧叟慨然貸集得十金爲生小布置詎吉賀
青布小藍輿搭紅彩紉草草迎娶母不得已送升輿遙致聲哭
曰兒去矣絕少賠奩情非得已爲母轉眼填溝壑兒有人心當
偕夫壻收我骨女輿中聞之心酸腸斷哭更哀其地距壻家廿
餘里道必經寶城茶亭天忽雨輿夫爭入亭中避且慙則先有
綵輿在焉鼓樂侍從婢媼如雲蓋商家女江鳳卿嫁於商子陳
生鉦者聞耿在輿中嚶嚶哭聲甚淒私以問婢婢曰是亦新嫁

娘曰爾試問渠別骨肉良足悲然男女婚嫁天下大倫何必如是之慟婢果潛詢耿曰母家貧壻家更貧烏私之戀牛衣之窘交迫於中不能不悲婢轉告曰是何難哉商家奢侈舊例凡嫁女必多置金錠於女懷袖中纍纍然名曰壓喜女私解腰際自繡香囊取袖中物裝滿且細裹付婢往持贈女捫之沉重問姓氏婢曰痴矣同一下嫁不過憐我亦憐卿之意轉瞬卽陌路豈欲索姓氏供長生祿位耶女尙欲咨曰而天已駕車馬紛馳東西各就道比至壻家果見蓬壁蕭條廡生竈突禮成私問范生曰四民各有業郎自問能居何業生頓蹙曰僕非痴瞽盲啞詩書曾勵貨殖亦嫻特運蹇徒搏空拳饔餐且難更何業之謀曰耶所憂者母金耳若能迎養吾母免凍餒妾有朱提奉假生搖手曰莫妄想僕已成真范丹卿又女范蠡耶女笑以覆擲生前

聲鏗然啓之得金錠五十兩驚且詢具告所以遂易孔方龜母
易新宅門前設小市墮女與母親爲會計囑生無誤讀年來肆
中利大獲生讀功大進屆秋試女皇呈營考具生曰身猶童子
能入棘闈乎女笑曰告君知晚矣月前已將百金援例入成均
榜發生獲雋明年成進士官浙之餘姚縣今年餘生一子卽同
之任其子眉目如畫呀呀學語能令人喜因名之曰喜官寅寮
傾慕爭與聯姻有成議夫婦忽同夢神人告曰公子婚姻莫草
草明日騎鳳過衙前者方是兒婦醒誌遺悵伺於門日下春無
所得惟一丐婦肩荷女子賣身啓曰江氏鳳卿江都難婦幼本
閨媛嫁於陳鉦家本富豪突與賊遇賊劉青海擄夫他去生死
莫憑焚掠可懼得隙潛逃乞食貴處生路已窮冥途若覩親生
一女名曰紫袖與其偕亡曷若出售伏願仁人買之爲後女但

得生我死何咎身入重泉遙祈福壽讀而止之入告夫人命
薄入略與盤詰見其風致不俗女尤婉麗知所言非謬方殷殷
問行止喜官突見鳳卽聳身索抱抱更索乳乳卽與鳳女紫兒
嬉不肯離侍婢奪抱卽呱呱啼鳳再抱之則又吃吃笑夫人大
喜卽留作保母問阿紫年幾何則長於喜一歲遂命以左乳乳
喜右乳乳紫願否曰願是夕喜卽堅依保母寢不肯去無已爲
置衣裙衾枕之屬囑其安心靜養扶持有日若公子大與阿紫
配卽親戚葭莩矣鳳曰鳳皇安得狎鳬鶩野馬何得逐麒麟夫
人一戲言恐折母子壽由是出則右抱喜而左携紫寢則左樓
喜而右懷紫紫亦宛轉得夫人憐果餌與共衣衫相同惟夢徵
則不以爲實鳳自得溫飽紋瘕微褪光澤復生咸謂貌與夫人
相伯仲厚但耳召殊稍夫人朝夕必偕薨登堂後小樓焚香

禮拜滿掃皆躬親從不假僕婦下則掩雙扉風雨無間斷諭有
擅登縱目者輕則詈辱重則撻楚衆疑爲敬斗禮佛拜天神鳳
識之亦凜凜恪守無敢違明年喜四歲紫五齡皆能學步偶戲
樓下喜欲上樓抱而他適大啼滾地若怒獅不忍拂姑携之梯
首一瞻仰略鬆腕兩小竟買勇拾級先登大驚隨之上心惴惴
恐罪責然亦無如何視樓上空洞惟中設小紫檀龕雕鏤極精
繡帷半掩鑪爐猶溫揭幔視神像烏有僅懸一繡荷囊不勝駭
詫再凝睇轉大慟哭之失聲喜與紫亦交啼婢媼益至曰婆子
瘋顛作耶抑大胆不怕死耶曰死便死哭自哭耳問何故曰囊
乃閨中舊製遣嫁時曾以之裹黃金十錠贈一途遇新嫁娘十
年重觀針線依然今昔懸殊不禁傷悼言已更哭夫人樓下聞
之詳卽飛奔上樓抱鳳哭詢曰姊姊眞繡囊主人耶抽咽曰然

曰想煞妹子矣妹子非姐姐無有今日且下樓叙悲苦呼夫人
詳告之中堂設筵鼓吹齊奏使婢媼爲鳳調脂粉御鉛黃更袍
服頂珠翠燦爛綵娜依舊夫人粧竟扶高坐夫妻朝服拜於下
鳳欲掙脫不可然後下人一一朝參讌飲終宵歡騰內外從此
動用一切與夫人同幹僕紛馳四出訪陳郎久無耗夫人告之
曰紫兒福慧已蒙神人媒訂許配喜兒所以不卽下聘者欲待
姊夫回耳一唱刀鐙卽謀鴈奠鳳亦許可每范郎公出姊妹卽
共枕鳳更拜耿太夫人爲義女手足之情更勝於尋常宛若也
一日有軍官投刺入爲參將陳裕云自雲南征劉青海回道出
餘姚乘使晉謁范以桑梓杯酌欸留陳面龐清俊言辭雅馴不
似管伍鳳於屏後窺客急往告夫人曰堂上客何貌似紫兒父
夫人告范卽然終以名異不杜信出而詢陳家世暨入營之由

客慘然曰僕原名鉦號子相所以改名者始爲賊榜繼入營行
每有戰功聽執事人書名荐剡以致於訛比覺已無及矣頃雖
邀恩回籍而家產蕩盡妻女死亡顧影煢煢實無歸著耳曰將
軍位臻三品宜早續鵲絃弟有舍妹貌才雙佳意欲奉爲箕帚
曰仲結朱陳意所欣幸但糟糠生死尙在未定容得實耗再求
玉音曰將軍眞情種也然弟爲君壽請先合盞俟尋得故劍舍
妹願退爲妾勝何如陳猶遜謝而范已傳鼓樂召儼相重門洞
開燈綵輝映衆僕爲陳更衣耿夫人在內已爲鳳粧就紅巾蓋
首艷婢挽扶畫燭雙行引入交拜須臾送入洞房陳起揭巾倫
睨彼此驚喜所謂先號咷而後笑也破鏡重圓其樂無極明日
後堂設宴請陳夫婦上坐范與夫人朝服再拜曰愚夫婦一身
外皆君夫人厚賜也所有家產願歸舊主言已呈上簿籍凡金

帛器皿書畫古玩僕從名字一一登誌詳細已極陳與鳳力却
不肯授彼此推讓數日不能定適解叟亦函請來署覽其事邀
幕府齒德福壽者三四輩爲大賓演劇設饌先爲兩家結案晉
然後公議頃猶同居三年後照簿瓜分爲二議始決

懷農氏曰吳六奇丐俠也湘蓮與鳳卿閨俠也今古茫茫平原
有幾求得一義氣肝胆而不愧者僅見於卑田院紅粉隊中亦
良足悲矣鬚眉男子尙有中山狼事況巾幗乎

瓶隱子

南陽杭孝廉性慷慨家富有而食客甚夥頗有孔北海座上客
常滿尊中酒不空詩意暇則奚童弱馬往來于酒旗村郭間偶
見一老漁翁鬚眉甚古停舟水畔穿着蕭疏爲賣酒者搗打甚
苦問何以故蓋漁翁性嗜飲而艱于資時于彼肆蕩飲索值不

與故飽以老拳孝廉慨然代翁償翁并不言謝且倚樹高歌曰
連日無魚欠酒錢酒家攔住釣魚船幾番欲脫簪衣當又恐明
朝是雨天孝廉奇其爲人間姓氏笑不答再詢之曰老夫無名
姓君但呼我爲酒漁便佳孝廉導之附郭一酒肆與之飲翁量
甚高啖嚼尤豪爽孝廉告肆主人云但貰酒與翁當一一代償
無缺也翁亦不言謝微醺持竿便去月餘偶至酒家問翁則酒
資已欠十千矣孝廉卽代償仍囑與飲數月無間斷一日翁持
魚挈酒踵門請見邀入卽高坐曰老嬰承公子愛愧未能報消
埃今將別矣謹以魚一尾酒一壺聊申芹獻孝廉命廚丁煮魚
溫酒與之縱飲甚歡問翁將何之曰萍水之人不過天涯海角
耳老夫屢觀公子氣宇不凡惟兩眉峯微有鎖澀未知有何隱
曲老夫庸拙或可代籌孝廉曰翁真洞鑒僕生平無不適然有

三恨事是以介介不能釋于中曰庸得聞乎曰先人收藏古琴一張滿身梅花斷彈之聲韻可搖五嶽泣鬼神召風雷裂金石偶携之過揚子江水神遣兩蛟挾舟索琴不與則波浪如山舟幾覆無已解囊投入水風濤忽恬舟穩渡此一恨也幼年狎一妓名曰玉簪極慧美預訂婚姻脫籍有日忽爲邊將紗袋島奪去人歸吒利世無押衙從此蕭郎竟成陌路此二恨也僕生平最愛杭州西湖而所居距杭太遠欲移往卜宅則南陽數十椽又屬先人創建棄之不可此地無山水應俗難堪雖欲學葛洪移居終不克效淮南拔宅此三恨也翁以手拍頸曰大不易思久之忽軒渠曰不難不難雖無此法力然假一異人手或能致南郭老松一株作蟠屈飛翔形者東邊一尺四寸地掘尺許可得古瓦瓶上有符籙幸勿傷其瓶掘出携歸安心對

之誦楞嚴經一百卷符籙自去瓶開而異人出幸勿語老夫饒
舌洩則事不成且于老夫大不利言已辭去明日郭外尋翁竟
無時孝廉遣奴荷鐻詣南郭果得松如法拙之果得瓶携歸奉
案上日對之誦經瓶口有藟如長成上皆深刻符籙丹書若干
經完藟忽飛起墮地一金甲神執爰忽忽至中庭突作霹靂向
空飛去孝廉驚駭正向瓶內端詳忽身後有環佩聲視之一美
女子年二八妍麗若天仙向孝廉拜孝廉曳之坐與問訊女子
自云通天狐唐時得道遊戲人間宋南渡時向親見斬王夫人
居楚州北神壘貧而織席夫人高鼻準面豐微麻斬王乃美少
年當手擒方臘時年僅二十四歲已則使酒誤殺人爲尹真君
收于瓶壑松下適見金甲神乃監符使者也身在瓶中沉悶地
獄若非大力幾不知若何甲子始能出頭但不知公子聽誰指

使乞明示庸兼報鴻燕耳曰僕屬茯苓偶得之曰符非經咒不開若碎瓶則身亦碎苦更難堪是非仙人不能謬此訣孝廉終不敢言問何名曰無名字但呼妾瓶隱子卽佳由是住孝廉書齋夜仍瓶中寢詩酒吟嘯相得甚歡但不及亂耳久之以三恨商于女女曰事甚易但減我千年道方成無已且爲公子一行明日負瓶往江上咒移時一小龍女蜥蜴大浮水來女急掬入瓶負之疾趨風雷忽起老龍領甲兵追逐女拔劍與鬥龍不能勝哀之曰向無嫌怨何擾吾愛女曰爾亦知擾之不情耶杭孝廉古琴徵世寶物爾何以威劫女欲珠還琴當璧返也龍曰諾捧琴與女而還小龍携歸示孝廉曰第一題先不辱命孝廉詳視久之曰非也吾琴背有古銘曰山深氣清萬籟蕭蕭古無人蹤惟石嶢嶢十六字女聞之大怒飄忽卽去向水咒移時以瓶

汲之水滔滔入須臾江能見底老龍懼遣世子問訊女不暇與
語卽收入瓶中將去老龍奔至曰仙人又將若何曰還我琴庖
人更務伎倆亦何可笑龍曰姑與子戲耳捧真琴至女驗明背
後字始與世子并還其水取歸付孝廉果原物也憩數日又投
邊將左右見有少女自帳後出年約十七八白簪帽沿風致極
美女疑卽玉簪兒之使昏迷遽入於瓶乘雲急返取出臥榻上
使孝廉驗真贗曰美則美矣却非玉簪也曰旣非玉簪曷還之
急投入又負之去至則人聲沸騰爭尋女公子女在雲中曰下
界人不須驚恐我月府侍書女公子亦月府掃花頃奉瑤璠妃
子鈞旨暫携歸一游今送還也跳落地女亦甦邊將沙婆島見
女迎謝喜溢六軍邀入殷殷問月府事女粉飾月府八寶合成
桂樹叢雜等語聞婆島呼曰召玉簪娘子來聽仙人說天上事

少頃一美女年約十八九美如仙問女曰仙人肩負瓦瓶作何
勾當曰是乃金仙承玉露者人能入此卽不死沙曰方寸地可
入乎曰吾有術在卽將軍柱石身入之蠅蟻耳曰試入之言已
果走入旋又趨出於是六軍咸爭入瓶口瞰之小如粟又復走
出如故沙問曰女子能入乎曰女子乃五惡漏體入恐汚吾寶
沙哀之曰無已俟入後當向天河湔滌始無恙姑許女公子與
玉簪娘子先入一試玉簪大喜携女公子入女亦跳入瓶突不
見通簪大譁以爲天上去或仍返久之竟杳女遁歸見孝廉曰
第二題又完卷矣以兩女委於地旋甦孝廉旣逢故劍又得新
歡樂真無極然恐邊將偵至移居之念更切復求女女以爲難
曰瓶隱子始勤終怠三題缺終非完璧曰此三題竟難煞人請
留此一恨爲天地間作缺陷孝廉固求之女終不許是夜擁雙

美寢終夜忽覺屋宇震動旋聞風濤聲又聞金鐵交鳴人馬廝殺聲驚起自窗隙外窺黑如漆旋聞遠寺鐘聲雞唱聲聲遂寂明晨門外視之則薤露輶光飛來冷泉均如排闥蓋早已移至矣惟人與瓶不見蹤跡明年孝廉囊古琴携雙美遊天台鴈蕩間見對面峯尖忽有雲氣冉冉至中有美人荷瓶俯瞰曰杭公子安樂耶視之女也三人同拜求晤叙曰爲公子第三恨妾幾遭不測尊潭亦甚危向夜爲君拔宅過揚子江痴雌挾仇欲以兵刦妾用神劍削其一耳而賢伉儷尙酣臥妾安置後正欲朝南海菩薩知之擒去笞八百背上瘡尚未愈君仁人也乞爲妾再諷楞嚴萬卷妾卽生受一言奉勸遊戲二字眞可怕耳言已飛去孝廉歸爲誦經如數自後亦得仙術偕兩美不知所之懊儂氏曰許俊之奪柳枝押衙之奪無雙延津再合已爲千古

所難而仙人意猶未足更卽其人之道以制其人之身瓶中數百寒暑豈英氣猶未平乎然足可爲豪偷勢奪者戒

懸眼救難產

松滋縣臨湖一大村落居民甚繁遂成墟市村盡處一禪院枕水次作鎖鑰寺之僧悟輪素精梵律而懵懂狀似無多知識惟生性不茹葷悞服必嘔吐欲死村人多欽佩一日坐禪榻入定少時忽張目大詫曰孽哉孽哉急起取孔方呼行者同入市井行至屠家門視架上尙懸半邊豕肉已兩日矣僧佯作垂涎狀問屠者曰夏亢日暖不怕生蠅蚋耶屠云前已誤執而斬頃正農忙舉市岑寂是以遲滯若蔬筍人鮮能知此味也僧曰擬謀旨蓄留宴嘉賓且佛云酒肉穿腹過服亦何妨與以半價可乎屠慨然與之僧給以錢命行者肩半肉繞街行見人卽合十曰

和尚向不服葷頃食指動忽思大嚼不知是何感應諸君曷偕
往看和尚吃肉衆奇其言紛紛來百人僧扃戶與衆傾談而廚
內刀砧響五味調須臾肉熟廚丁來報僧伏地膜拜曰和尚吃
肉則半生之苦行傾盡矣祈衆居士代爲鑒歠何如衆大笑
曰和尚作東道故打誑語賺我輩來耶爭起覓箸攪碗少頃告
盡僧視釜中湯無涓滴剩開戶撫掌大笑曰善哉善哉公等若
餘興未盡可同往前村李大戶家再啖湯餅衆不深信有黠者
往視之果一家欣忭嬰兒啼呱呱細詢云何則產婦坐草已兩
日餘腹奇痛而胎不落醫術俱窮迨寺中之肉啖盡而嬰赤始
墮地蓋魂爲兒之前身也至是大衆咸知僧有慧眼爭來問三
生僧厭其煩飛錫遠引朝四大名山某歲自五臺回道出桃源
挂劊于淮濱寺頓抱煩疾頽疲不起偶思食來其無淨釜可煮

行者覓銅鍋一具乃不久煮蒜食者一服卽吐瀉而逝寺僧焚其骨盛以布囊挂樓壁上余幕遊其地見之頗悵觸急爲覓高原尺寸地緘以木龕葬之題其短碣曰行脚僧悟輪禪師之墓

俞翠燕完貞

俞叟名愚字真愚年將杖鄉祇一女名翠燕貌妍麗若天人愚因抱鄧攸戚盡以生平文藝授之有林下風焉幼字同里石生名鼎者生日日抱本頭業中落賴寡母紡績爲活而窘狀時露戚里咸藐視之炊烟斷雖貸一文錢亦不與愚漸悔以金啗生母生知之頗不平母笑曰吾患兒不成不思無兒婦倚賴祖宗蔭竟發籍何患無金釵十二行也渠俗骨那有眼覷孤寡曷允其請爲便生泣受教明日遂以離婿書換金歸藉免餒矣里有張武舉名大黠字其信者家素饒瞰女美以多資強委禽粧且

期速遣嫁愚欣然詰愚婦知其事已成無如何惟不敢遽告女至驚詫私慮危於衷者惟女之寡嫗安山氏耳素與香積庵尼阿鸚善鸚適索月供見滿座置箱篋几榻皆嶄新衣裙釵鈿正營製笑謂女曰翠姑大喜鵲橋不遠矣女正疑懼聞尼言心怔忡益慮有他變私詢於嫗曰阿鸚日間言究云何嫗半晌不能對女又問嫗曰汝今夕將出閣何絮絮女面頰良久曰女子終有下嫁日兒原知之但嫗家素貧不知何若是之華麗嫗笑曰小妮子太頑厚汝知嫗家姓乎曰石郎也曰石郎耶張孝廉也女大驚曰兒幼字石郎媒妁所憑神天共鑒何曾字張嫗遂爲女述顛末且曰汝父恐汝嫗情憤不耐守四壁張豪富里有小鄧通之號行將錦衣玉食不勝於依窮措大操井曰尙不獲一飽耶女哭曰嫗素鍾愛女猶子今何忍加戲謔嫗又以離婚書

對女益悲不自勝曰死耳死耳復何言嬖見其意決釋久之慨然曰且少安倘萬無策吾當導爾遁問遁何處曰汝有姨母居郭外三里許渠又寡家無應門童汝忘之耶遁彼處極便女伏地叩曰事急矣曷卽遁曰可咸椎髻布衣啓後戶篝燈出行許時繭足遲滯汗泠泠氣吁吁頗苦賴嬖挾之行將抵門曰到矣女欲扣扉曰且緩須臾自門隙瞰之則見姨與少年僧燈下偃倚昵飲狀甚褻女哭曰進退俱不可奈何嬖亦棘手繼自笑曰唉此去石家不遠曷卽往投忽忽成嘉禮雖天王子不能攫矣女曰私奔可乎嬖曰小妮子何其痴老身雖巾幘汝長上也豈有長上送之家而曰私奔乎女恍然悟遂偕之尋別逕行憫憐間果見老屋數椽熒熒露燈火機杼軋軋與書聲相倡和蓋生方夜讀而母正紡績兩人遽掩入母固識女駭問何來安山氏

具述之且曰請闔扉下鍵草草卽合褰脫有變老身自當之又
謂女曰我憐汝志始作女崑崙石郎非終於貧賤者善事姑與
良人無恃嬌貽老身憂相與灑涕立俟成禮而去是夕卽張親
迎夕也夜午僕從鼓吹舁肩輿至而愚正尋女與嬀不見惶急
非常詢傭媼及門外擊柝人始審二女向某路行度是姨家遂
偕張輿從往尋姨正與僧裸登楊忽聞剝啄甚厲倉皇無匿僧
處與窮袴外以被裹之置榻下自則着衣出詢爲誰以尋女對
姨大罵不肯啓張益信叩門益急無已啓之衆闖入姨色變衆
遍搜得榻下裹捫之膩然者人也張大喜抱置輿中鼓吹立抵
家呼婢妾速扶新人出再遲恐悶煞沒頭鵝矣詎解被睇視則
光其顙而目灼灼者僧也婢妾譁然奔避張怒極叩署鳴於官
官命且鎖置門房邊側室俟天曙始訊安山氏聞之大詫曰渠

雖不貞然究由我故喪廉恥罪戾深矣夤夜遺幹僕袖金賂衙役且懇庵尼阿鶚爲更籌計遂出僧而置尼於裏明日官坐堂皇提褰勘解則光其顙而目亦灼灼者尼也呼媒媼捫之果尼鶚號泣曰尼與媼婦本舊識共習女紅夜深不能歸留宿作方外談有何罪過而縛置公堂此大辱不願生矣乞杖下斃之爲快官亦拍案怒未已然究不知愚女往何處安山氏遂自首詳述顛末且證媼無淫行慷慨陳詞淚隨聲墮官爲動容卽飛籤械張俞至欲懲以刑叩數十始罰張出百金爲女作奩資出百金半與尼半與安山氏又罰俞出腴田百餘畝與生供膏火案結釋衆出生由是家漸裕讀更倍明年成進士歷官守牧有政聲皆翠燕內助功也愚晚景頗困如生當日猶賴生恤太夫人故官再起堅請安山氏進署奉之如母焉偶有訟僧奸狀者庭

訊時安山自屏後窺之卽當日婦狎之留也託鉢遁此又遭法網立予重懲遂還俗云

與僕氏曰翠燕守貞剛婦之功也否則一死而已於事有何裨益質哉安山氏亦俠亦仁亦智亦勇亦權鬚眉中且不可多見況巾幗乎舉世迂儒拘牽繩墨而憤大事者若以安山氏爲法則化臭腐卽爲奇矣嘻

東野砧娘

紅仇性執有大毒能殺人然北方沙瘠且生虫害稼穡土人恆購以培地所以殺地蛆也人有誤入口者輒腸斷而死閔祝字三祭汶上農叟閔貧子幼敏慧貌溫婉若處女爲父母所鍾愛東野子良與貧總角交長尤克逆顧阡陌毗連兩家村僅隔三四里時過從話桑麻焉子良女名砧娘年與祝相仿貌麗而性

貞子良偶與賢互眷小兒女遂聯奏晉祝瞬年十九矣耕耘之暇頗事咕嗶不喜與牧豎嬉鄰婦有蕩者恆挑之輒面頰逸去目爲痴不顧也村東樂氏婦尤風騷而性又驕悍虐夫如犬馬翁姑見之恒股慄時盜牧豎宿田畔風露卑濕久久成癰癩疾膚裂髮髡更爲人所不齒隣婦銜祝思傾之適樂婦借鋤坐簷下矮足几閒話移時始去祝又過堅請小憩卽以几與之坐祝素羸弱一感觸卽沾染月餘遍體爬搔較樂婦爲尤苦醫藥無效父母恐爲閹家患衫櫛置門邊小斗室從此飲食溲溺皆須人苦可知矣村人咸疑爲時症實不知其爲隣婦耳也隣婦反誚祝曰君患此可惜姑姑貌若天仙竟不能消受奈何祝默然益心痛子良夫婦漸有悔意然猶冀其痊可詎明年兩家均屆標榜而祝病加劇子良婦不能忍暗倩戚友通其意賢未

及答婦勃然怒曰吾子非生而病者誰定其病百年渠家急急
即不能待吾子死而後嫁耶賢欲允其請惟得婦而客已逡巡
去矣賢詣內婦怒猶未已賢曰祝病朝暮人耳或與碯婢本無
夫婦緣然則累渠預寡將若何婦曰旣憑媒妁結朱陳能如是
之易毀乎行將携新婦歸或子死尙有離鸞媳也祝病久終日
臥繩牀僕媼咸厭惡隣婦惡作劇頗私悔反時來服役極殷勤
偶洩子良意祝悲曰此前生孽也尙累人家閨秀貽來世冤乎
午夜力疾寫離婚書流婦達子良不敢受寄賢閱賢曰豚兒意
良佳何必辭祝又徇徇往見子良曰某命薄負長者愛閨中人
年已破瓜而某病入膏肓請改絃萬勿域成議言已涕拜呈書
而出子良錯愕不知所云呼以牛背送之返旋晤賢曰毀婚出
賢即意阿翁將若何賢曰易耳即於婚書後署己名而判以押

子良袖歸夜語婦砧娘聞之突出痛哭曰兒聞中無失德處未審何故遭閔氏棄以病對曰病何碍卽渠病兒固渠婦卽死兒亦渠婦不知其他也子良語塞女歸寢啼終夜久之讖婚者趾錯於門女審之確憤然曰是真不可暫止矣夜起盜篋中離婚書天明椎髻大布衣自奔於閔氏之門登堂拜舅姑閔夫婦驚訊兒來云何曰來作新婦耳因泣述二老悔婚無已從權變不及候嘉禮之由曰婚已毀矣女佯驚問毀婚故曰祝將不久卽苟延亦罔敦琴瑟好女笑曰兒疑遭棄必新婦有失德處若因良人病卽若此恐有乖女子從一之義兄來事舅姑兼視夫疾抵死不願歸矣言已自起雜家人樵作賢急延子良來正計議女奔出伏地叩曰翁父俱在此兒旣非失德安用此離婚書哉言已出袖中書拉雜摧燒之隣里父老莫不驚歎曰賢婦賢婦

敢再有議離者有如此書子良無已辭去拚與女絕而女竟事
事得二老憐愛一日跪請於姑曰兒來爲良人疾身旣分明矣
阿婆曷引兒視良人姑諾祝止呻吟突見女驚且悲姑悲曰兒
無福負此賢婦女亦悲旋收淚謂姑曰此皮膚疾非心腹憂會
自痊耳意欲朝夕侍湯藥未知可背於義乎姑曰兒自不嫌汚
穢老身且感激何禁止爲夜卽夫榻下藉氈眠盥濯調護臻至
祝於無人時對女泣女慰藉良殷毫無戚戚狀明年春西疇農
事興賢從市上購础石回約三四斗將布畎畝而未遑置諸礎
戒兒童莫沾唇因祝終日臥特置繩牀下命守之祝時自怨艾
不願生意死渠望一斷或改適恨無死法偶見础思借以自戕
女適出饁耕祝潛起摸一小塊掩淚吞服意將腹痛詎偶臥匝
宵竟無恙疑爲少又多服之仍無恙且病若少解遂攫十數枚

藏枕畔昨夕咀嚙之不半月體漸光澤沉疴霍然女并曰餘服時禱於村西藥王祠願以身代頃見其將痊心疑藥王靈闕不宣適又饒南畝隣婦嘲之曰若個小娘子偏投病漢宿樂家小官人偏伴病妻眠豈月下老錯配婚姻耶女笑曰姊姊莫耽憂我家病男兒終有日翩翩出門庭那時方羨羅敷夫婿殊也衆疑其言往瞰之則已二豎潛逃一表出衆矣閔夫婦出看亦驚喜子良來愈慚慙然均疑女子貞操所感實不知其服砒石也祝至是始扶杖出緬述其故衆俱贊歎豈竟大愈村人傳爲艷談藥王祠香火僧通歧黃聞之憮然曰砒本殺虫祛濕以毒攻毒理或有之然從此爲癰癩門增一肘後方矣村人請於兩家長上爲男女行合巹禮鼓吹喧闐冠裳雲集是日庭中花草枝枝皆連理並頭樹上羽毛個個呼比翼共命覺前日之厄罔莫

名今日之樂亦靡極也時樂家婦病益劇而橫絲恣夫與舅姑均憚其威婦偶聞閔祝事且信廟僧語堅欲服砒舅姑不可婦卽拍枕槌床以詈曰汝一家冀我死拔去眼中釘耶不然何有此良劑而吝不我與夫憤極卽潛授之服炊許顏色忽變七竅流血斃矣

悞儂氏曰賢哉砒娘生長於村氓田畯之家耳不聽詩書目不覩母誠居然百折不回有我心匪石之概卒能感格上蒼爲夫再造祝病之愈由婦之貞也豈真砒石比返魂香哉樂婦效顰殞命亦何可笑噫士君子不窮源務本而動輒效顰者皆樂婦之流也嘻直隸崔春圃爲我言之捧腹不置

田處士石驢

陸翁守素東平安山人性仁厚家殷實素與同里盧姓友善盧

產薄財帛往來時陰蝕翁漠不爲怪嘗貸翁工百金欲立券翁笑曰我輩父以心信實爲質更何券爲翁有子名駿廬有女年相若盧感翁德以女妻其子由是交益厚迨翁遭故中落婢僕星散門可張羅憶向之鮮衣策衛而出今則徒步當車抑鬱于中遂致疾翁疾日篤而盧跡日疎願藥餌無靈漸卽纏綿牀第翁先富後貧盧先貧後富鄉里知之莫不爲之嗟嘆翁垂斃日後事皆無措呼駿諭之曰我魂游墟墓無復生理家雖貧幸汝岳盧君曾貸我二百金可索還爲我殯殮費駿聞券曰旣至交又至戚尙須券乎渠是老父車笠友第往索無過慮駿尙猶夷妻盧氏促之曰道路之人孰不知我父受翁德卽無貸亦義不獲辭况有貸乎且翁語妾親聞之矣駿果竭蹶往盧笑曰爾父昏督讖語耶然旣有是言曷持券來索駿告以父語無券之由

盧故作軒渠曰過矣過矣世雖親手起居稱貸亦必借梓城爲証不然烏鰲書可無需矣我非人面獸心者何至賴貸本當小資助但有一節恐人唾罵盧某爲賴貸人葭莩之薄非得已耳駿聞之愕然返則翁已奄奄私告妻亦莫測真贋明日翁捐館將易簀舉室悲號忽一老羽士鶴髮虬髯芒鞋竹杖杖上挂一小壺盧登堂求見駿出羽士曰某田姓名木人呼爲處士頃因濟寧嶽山元女廟失修素稔令尊人慷慨故來募幸勿吞駿告以老父甫卒殮具尙無追應募處士曰僕有回生術曷導而觀之比入則哭聲頓止蓋翁已氣斷復續漸有生機矣處士略診視曰是不過鬱結失調何至死袖出小石驢寸許若刻劃微肖者咒移時卽宛轉成真驢呦呦鳴處士喃喃與驢語驢仰天笑處士曰長面公我來募居士金非療居士疾忘携丹來汝曷

爲我往嶺山取一粒驢長鳴似首肯旋奮蹄銜壺盧出門去駁
曰嶺山相隔百里何時始達曰易耳頃刻驢果返仍以壺盧置
處士前傾之得丹藥一粒大如珠燦如火立命調和灌翁口炊
許翁喉咯咯鳴吐出痰塊盪大頓清醒駁夫妻急叩謝延叟廳
事坐意借杯酌酬之處士搖壺盧尙縛又傾一丹出小於前而
香益勝故錯愕問驢曰多取一粒欲何爲驢仰天笑不已又鳴
嗚嗚處士點首曰誠然誠然長面公可謂慮之周矣因以丹授
駁妻曰曷寶藏之將有要用言已欲去挽之不可驢然策驢不
知何往駁詣內問翁喟然曰危矣哉非跨驢叟則登鬼錄矣呼
飲以渣滓進精神遂復起坐告家人曰頃爲兩役引去行里許
忽見一長髯叟策驢來舉鞭叱役曰渠素善多少事尙未了曷
交付我汝等告閭閻無罪也役去卽引之還比到門突履闕一

跌遽如夢醒一家聞翁言益信曰田處士者仙也焚香叩謝不
已盧聞之含愧具酒醴來爲翁賀再生踟躕殊甚一日翁偶詢
前事駿以實告翁默默良久恍然曰是誠我之健忘戒兒婦毋
再饒舌盧見翁坦然以爲真忘心竊喜而跡漸親偶夾飲翁處
把杯傾譚甚歡盧忽捧心呼痛極遣人送之歸翁猶獨酌忽見
盧返喜詢痊否則倏忽不見正駭異聞傭來告曰後院甌中鹽
生一駒良佳翁往閱果雄偉依依如舊相識心疑之持梃遽擊
斃家人疑駭莫解所謂蓋翁自服田處士丹後心境極明朗頗
知未來事特不言耳頃出喚駿曰爾岳殆矣曷偵之駿往果一
家沸騰詢諸僕曰頃扶物入門忽引吭作騷鳴倒地遂絕灌救
移時始甦時猶哀哭不已駿入視盧搖手以首面壁曰無臉見
汝可爲我歸謝尊人也駿返告翁笑置之翌日盧盛服以牛車

載阿堵藥藥來登堂再拜向翁曰蒙君再生感莫大焉敢賴
逋負耶今知過矣乞鑒原翁却之不可復置酒詢病由盧慙愧
曰言之實貽外人笑然不言又不足以警世某告歸時心痛且
劇忽途遇一策驢叟笑顧余曰我處士田木也前爲陸君療疾
者某驚且拜叟曰子心痛曷飲石邊水引至一處清泉瑩然命
飲訖視石邊一洞內儲朱槌如山積正痴望叟遽拍余項曰狡
獍哉啞然墮地顧身已化爲君家驢駒其并翁當頭棒則修耳
禿尾不能免矣翁正驚詫再三慰藉忽婢媼至報曰小娘子
雉經矣趨視之則三尺紅羅盧氏已挂梁際蓋羞父所爲慙而
自縊者舉室正無措翁問曰處士所贈第二丹尙在乎駁焉然
憶從妻緇篋拾出解瀧移時亦甦盧愧而逸去翁明日忽夢處
士來曰公生矣卽不能爲嶽山了心願乎翁再拜曰非不願也

顧力綿也曰盧某斗室中有藏鑑以得二千金言已拂袖去而
翁亦醒誌之終不解月餘盧因鄉人恥笑意賣宅他徙苦無受
者遣人詢翁翁慨然出還令買其宅遷甫定掘之數適符焉命
駁齋千金往贖山布施見山足有石叟石驢像宛轉如生詢土
人曰此果老與驢也始悟處士田姓木名者合成果字也翁後
壽九十益行善事勿替駁中鄉魁世世祀田處士其虔但不知
盧之後裔若何耳杜若香先生曾任東平判官聞土人詳述如
此

懷僕氏曰驢龐然自大俗物也然而灞橋風雪曾負詩囊劍閣
崎嶇亦饒畫意使負債狡賴者僅罰爲驢猶屬仙人之大慈悲
大方便處吾謂石化驢者獸而仙也人化驢者人而獸也果有
其事恐天下之赴訴於果老者不一其人矣

桑兒

揚州市上有一種惡少年青衣巨髯貌赴赴名曰桑兒東市斫西市斫詐取鄉人財爲生活官法不能遏亦不畏大肆商賈憚之三節皆有規例或以破頭巾或以破草屨遣人送肆中見卽給錢如左券有熊姓名殺者亦桑兒尤凶悍好博益困頓歲暮風雪滿城饑甚意步長街尋鄉愚中弱者而魚肉之至小東門古巷口擁鼻行突有一物得足滑蹶幾傾跌拾得窘頓乃布袱中裹朱提十餘兩袱膩垢幾滿且補綴知非富兒物窮漢慕得財大喜旣而自思生平惡籍何德能獲財抑神明戲我耶再審視翹邊細紋零星小綻爲銀無疑又思此若富兒物取之猶嫌少嫌遲若窮人有急難要需一旦傾墮則性命終矣思再三毛髮森豎乃懷金忍凍坐候之少時一人若公役狀蒙袂輯屨貿

貿然來掩涕折腰若尋物狀轉至巷口驚視熊熊若不知起隨之行夫已氏前之醉後之跣步不離怒氣此熊熊不語惟冷笑須臾若人大哭曰吾其死乎貧牀頭人矣熊緩詢之曰告爾亦何裨益曰予試言之曰吾佟姓充甘泉催租隸欠官賦敲朴比限家無長物頃掙數比尤急某告貸無門不得已賣妻於塔院前賣酒王翁翁猶不允求再三始受而給身價銀十五兩正携赴公庭經巷口小遺竟失落覓無跡行將就獄畢命矣尙復何言熊曰爾狀爾銀若干件記憶乎佟言之不謬乃慨然探懷與之曰是此非耶佟驚喜伏地叩有聲復拉之縣門曰爾曷納之吾與爾言佟曰諾心疑熊將索謝然亦已所願也少頃復出顧銀尙餘二兩擬酬之熊挈之急向塔院行見佟之妻已愁眉凝蹙爲主人當鑪滌器若婢妾佟顧曰是耶曰然遂趨入視

主人正會計遽呼曰來與爾言主見照大驚曰若何爲曰爾曾私買人口乎王囁嚅曰我鬻髮如此尙買妾勝乎渠哀之不得已始受之耳照笑曰翁誤矣此我之妻也渠與我隣且契好渠比賦急求我我思慷慨義俠無如翁明言之恐翁吝故遣渠携拙荆來非賣於翁實賺翁行仁義耳拙荆粗醜不足奉巾櫛盍早遣珠還不然一宵臥明卽不能辨清白翁視我餓丈夫豈能戴綠頭巾者翁大怒譁且辨熊亦怒曰花花世界奪人妻耶翁呼曰湯湯乾坤誑人財耶熊以頭觸酒罇血被面翁猶不少屈熊遽掀案上石硯擲擊翁幾碎其顙幸少偏然而酒甕破矣隣佑環視皆笑翁老邁不應買少婦又勸翁何必與若較渠慣受笞辱上棒痕皺瘡厚卽鳴官公門中無空手出入者渠尙有分文去耶翁曰將若何隣曰不如還妻於若翁曰女旣珠還銀亦

當劍返也。時曰：好男子無賴債之理，與爾券。眾署押隣笑曰：休矣。或爾遇橫財，得窖藏，不然持券向海龍王索道。耶翁知不敵太息曰：嘻，八十歲老娘倒繃孩兒，無怪昨宵夢不祥。竟果然速携爾妻去，無誤。乃公事畢，遂左挈佟妻，右挈佟，向隣略申謝。卽笑顧兩口曰：歸去來，親送至佟所居，呼四隣老幼，與婦告其顛末。且囑曰：吾雖貧實，不忍視佟某慘別。今渠已破鏡重圓，卽煩諸君好看顧。若渠再賣，若妻吾雖無賴，頭顱血不能白流也。眾曰：諾。敢不如命。佟亦對天誓妻，更泣且叩，不能仰。眾義之，欲留以飲膳。時笑曰：某豈以顱血圖哺啜耶？佟以所餘之銀酬其德曰：我若愛爾財子命，休矣。長笑搖手去，行如飛。漸遠，自思腹尙餒，天又暮，奈何？姑妄行，或遇故人，博一粥。行至三義閣畔，經大家花園後，一帶牡蠣牆，梅花枝透出牆外，凍鴛歸林宿。其聲

啁啾又見新月上其色昏黃見一少年短身軀神致不定逡巡牆下若有窺伺熊思此梁上君子耶曷徐覘其異忽牆內女子喚狸奴聲少年學貓啼又低問曰來乎少年悄應之曰來旋擲一包裹出頃又擲二三年堆包裹倚牆若梯階倏一好女子貌姣媚登牆踏包裹少年扶之下然後一一負於背携女子向南行熊至是始恍然知爲大家婢僕潛亡者急隨後大呼曰小子向何處去少年驚捨女欲遁熊又呼曰留下包裹逃生去果盡委之地熊亦不窮追遂携婢踵門而告其主主大駭曰爾能若是耶何德而能代捕亡曰小人日於閭閻前攫人財公僅呼叱從未以半刺送公庭日在霜戟中旣寓目敢忘大德耶言已崩角籲恩問何需曰求公恕婢子若泥中人因此杖下斃是小人冤孽也家主曰清白門不欲揚中游醜爾無婦曷卽携去

急辭曰小人無片瓦錙立自顧不暇更何力養妻子主曰南河下迎北三椽小衡茅本仙人居現以人去屬爾居之至包裹三四已去之財不欲復返諒必黃白物多寡憑爾福命亦携去作小貿易何如熊辭之不獲頓首謝主人遣僕持餽送之往笑曰便易爾亦天緣也若由此做好人或反是一段佳話遂去視其屋甚雅潔几榻鐺曰略備明日邀隣家媼及佟妻代摒擋草草成花燭熊雖桑兒中魁首而貌甚清癯年僅而立婢甚喜之視橐中皆細軟質珠翠釵釧得五百餘金遂於臨河開酒肆自著犢鼻褌妻當爐頗獲利稍稍置田廬時以佳果珍味進妻之舊主昔日同儕時來擾舊主左袒之無恙明年生一子名天賜甚聰穎有膂力佟後除役作貿易亦得利生女名意兒甚慧麗感熊恩以意兒許其子天賜壯入行伍隨楊將軍西征有功官松

桃協熊夫妻年六十覃恩封一品更貤封外家出則安輿怒馬
鮮服姣童人爭呼之曰熊老封翁猶背其子倫以金錢恤市上
桑兒

懷儂氏曰損名喪節如桑兒熊君可謂千夫所指無疾將死者
矣而乃一會轉移如響斯應與人妻者天亦與以妻與人金者
天亦與以金且與以佳麗多金之妻卒之令子成名翁猶嬰鑠
一時列門之左右者方且吮舐之不暇敢道其所由來乎噫紅
絲繫足之權固不在月老也

血瘤中有大紅寶石

江南有富家子皇甫公名漢傑年二十有五忽患病不起醫藥
罔效纏綿牀第間瞑目待盡妻妾兒女團圍守之哭殮裳櫬具
悉備僅一綫殘喘耳皇甫口不能言而心神尙清見有褐衣兩

男子楊朱書木版來召曰主人傳語奉迂過從心意爲勾魂使何尙云請身不覺冉冉起隨褐衣人行巡路曲折山谷極深絕非家門口路途知爲幽冥卽亦不懼須臾至一公麻執戟卽將左右侍間褐衣人曰至乎曰至矣旋聞宣召引入伏階下堂上空洞無長物旋有四垂髻女下樓安几榻又四五艷服宮衣美女扶一老叟出南面坐美人左右侍捧劍者卽者葫蘆麈尾方竹杖者鵠立無敢譁潛睨叟古衣冠鬚髮如雪眉如白毫垂二尺許聞清磬一聲其聲鏗然卽有七八人老穉妍媸不一深衣闊服皆同登堂稽首命兩廂席地坐叟遽問曰爾皇甫漢傑乎曰然曰沈疴當死知之乎乃泣求援曰老夫放汝生願乎乃稽首謝曰舉世習醫者皆貪鄙庸俗迫於飢寒朝讀岐黃夕搜阿堵視人命爲兒戲殊可痛恨聞有家道豐不急索謝者非質魯

卽因循以故庸醫多而良醫絕少功曹稱爾業豐而性廉資敏而志篤爾大可學醫吾樂王也當解汝厄皇甫曰弟子深願學此惜年已二十有五無師承恐不得其門而入耳叟曰爾習之自有師且易升堂遏止入門乎言已左顧卽有一美人以盞盧呈上傾出一丸賜卽吞服皇甫覺神致遽清痛癢若失叟顧席地坐者曰誰送皇甫出西向一少年年約十四五麻皮裙髮垂領起曰門人願送渠返叟曰本有緣送渠返勝爲之驅二豎也皇甫跪求方略曰習醫無他法勿泥古方勿恣偏見勿遽好名勿急求驗黃帝難經揣摩簡練爐火青時天心自現爾往矣從此稱良相也遂再拜辭出少年前引候至家門前忽有荷池綠雲丹粉五色陸離倚欄玩賞少年遽從後推墮急狂呼突如夢醒視家人爲之更衣喜曰大邱魅矣蓋死已一朝易簪見其清

醒且呼飲蔗漿知再生仍昇歸內寢調攝多時病豁然瘳月餘
平復遂倩工塑藥王及少年像虔祀之晨夕琅琅讀素問等書
漸能精進忽聞丹徒有名醫程公負笈往受業以夢告師程不
深信惟愛其穎悟盡傳真訣忽覩所懸藥王像旁有少年問伊
說再以夢告程泣曰此亡兒也兒生時有神童之目十二完經
書十三學青囊一覽瞭然忽於十四歲病殤親畫像同其傳隸
藥王座下爲弟子乎皇甫更歎嗟述送歸之德曰師生情好鬼
神已預諳更何辭在再三年程遣皇甫歸曰可矣由此加功更
登無上乘若云濟世則無不利涕泣告辭其名大著時東鄉濱
湖有男子年三十餘生平未娶且從未近女色的真童身若不
知有人道者無容屬孑然一身遂近水結蘆棚倚村捕魚以餬
口更深守釣往往臥月中卽入棚宿星月光彩亦滿身習慣不

以爲苦也頃忽左肩患一血瘤始小於盃繼大如盞光瑩瑩若
皮甚薄偶觸卽痛澈心肺兩手執物亦痛自思漁家子何能坐
食勉爲之年餘竟不支面若死灰氣患喘嗽步入城遍問醫家
不能治心慈者引見皇甫求濟拯時皇甫已遍購醫書約萬餘
卷儲滿一樓見亦不解卽翻書檢閱前人無此說不能造次買
舟携男子往尋師師亦不能解復乘舟過返夕與男子閒話間
訊平生得子幾人告以所以皇甫心意其露宿久受寒深與積
溫凝結乎又思扁鵲破瘤小鳥蟪伏等奇疾其再生之乎三四
日屢投藥劑無效思不如用刀卽齋沐焚香禱於藥王像翌晨
以護心丹投下然後縛於柱俟目瞑神曠卽袖抽薄刃如柳葉
龜瘤面直刺格格不能入惟皮翻裂露黃油如脂大駭試按之
中實而四圍虛卽換利刃就四圍割刃甫下卽脆如瓠落墮

地礮然囁人守之恐爲貓犬食自解縛扶男子臥榻上藥水洗
刀口血如縷拭盡數珍珠八寶等貴品藥裹以絹使不漏風至
夜男子甦急投補劑病良已再視割下者層層黃皮如蒜瓣之
包裹削盡則中有碗大一塊堅硬物非晶非玉燦爛晶瑩其赤
如火其圓如毬一面有紋如滴淚痕如草篆字不可辨一面圓
圈中有螭鬼形刻畫逼肖甚不可解久之忽悟曰渠以童身臥
星月下十餘載精華凝結而成然患去而精力亦去是人其能
久乎遂諭其人不必操舊業卽爲守書樓司灑掃以盡餘年皇
甫功德甚厚醫法甚奇此其一端也後數年其人果卒皇甫厚
歛之隨以寶石示一骨董見云絕好一頭品冠頂願以千金售
之卒不允

慎儂氏曰華陀治瘡出蛇與黃雀出針與棋子區區頑石猶屬

尋常噫小人飢寒半世獲此塊然使仁人君子見此一拳尙當
流涕寶之云乎哉

儼然齊人

汪士元懷寧秀產因貧未娶寄遠郭授童子經偶飲同社生家
某一妻兩妾正爭寵獅吼達闕外生微笑云君比齊人更多其
一宜其苦也某羞怒云君莫齒冷恐他日身當其境亦如是謁
蹠耳生云僕一妻尙難遑計覓柳枝桃葉時座客李生萬年亦
爲之捧腹生旋聘邑故紳楊氏女素蘭年十八有艷名將于歸
而龜江突戒嚴楊夫人養疴居許溪女入城營家藏正捆載忽
聞北城陷急蓮頭垢面雜隣媼出南關纖足挪移苦可知矣數
里一高嶺插面諸女嶺下休息忽飛騎傳呼云賊大隊從嶺南
來矣衆譁散女兢兢無適從瞰嶺右有老枯槐大十圍腹空心

借以隱身果聞人馬雜遝嬰嬰悲啼午至申聲始寂潛出覓路
一少年自榛莽中探首望出與女揖詢何往女哀告之間秀才
知潞溪遐邇乎少年睥睨良久曰誠不遠嶺南五里地耳然夕
陽墮矣深夜荒郊何所不有娘行又蓮步恐不死于賊而死于
虎狼也溪水轉處隱隱露茅屋數椽爲某親串家地僻無男子
僅一老嫗守門曷住投之翌卽倚嫗送之歸不過多酬數貫錢
是策之上也女凝思無如何涕泣尾之行至則一畝宮大于艇
果有斑白嫗引領望見而咤曰相公乘亂離遂不告而娶耶便
易哉少年云婆子莫妄饒舌此良家女宿一宵卽去嫗與之絮
語問長短說賊勢又悲兒子入城充團防卒未回瀟淚不止少
年詭云無恙安慰之命具夕饌殊草草女思母難下咽夜漆黑
無燈少年他舍宿嫗伴女眠殷殷問氏族女自云亡父曾仕聞

喜令身甫字南塘汪秀才未卜存亡因而泣下媼云適導汝來
之李秀才名萬年者必與汝夫同膠庠何不向致訊蹤跡彼卽
吾之田主人也近亦聘潘家四姑姑好模樣惜未娶耳正問答
間聞李在窗外蹀躞且咳唾旋喚媼出囁語細莫能辨媼再
入喘若牛雜戰兢漏約三下促女卸衣眠女漫應之旋又反側
自語曰老朽昏瞶矣廚門未掩野貓餓剩羹恐碰破瓦盆子卽
起披衣出女心知有變整衣端坐李果掩入偃而挑之女厲聲
曰日蒙引導德也今若此德云乎哉儂自有夫君自有婦瓜李
嫌讀書人勿輕蹈李不應狎且迫女力拒狂呼且痛罵聲達戶
外李堅抱仍不釋媼遠伺而莫援正危急忽門外剝啄甚厲握
石如播鼓媼入禁其哭而出自門隙窺見兩少年皆急裝然炬
一束宛似紅巾之夜巡者媼哀云荒村斗大瓶無一撮糧乞大

王可憐見門外人厲聲云開卽宥汝命再緩且火汝宅矣嫗無
已甫拔鍵雙雙沖入而李家少年已踰屋後短垣遁矣先是汪
生在館聞城破素備儻亦曾習武事卽以紅披風扮賊人裝來
近城偵楊氏母女耗遇隣審女迷失懊喪返逢女子泣路隅疑
爲素蘭訊知爲李之聘妻潘氏女亦隨娣姒轟散欲投李氏田
舍不識途因乞生導李曾邀生此處看桃花故欣然偕行恐釵
弁碍人目拾地下男衣靴命潘改裝鑽石然束薪爲炬至此釋
重負焉及聞女子啼哭聲見老嫗兢惕狀大疑出靴中短刀嚇
嫗曰汝藏何人而喧歟若是曰此李田主所携者悲離散耳聞
李何往曰聞大王來逸矣生躑足太息指改裝人曰此卽渠室
潘四姑又相左奈何女脫帽露雲鬢果一姣好娘問携來究誰
氏子嫗不敢對生問夜何其將別去潘牽衣戀戀生笑曰我汪

士元方自失其妻遑有暇攬人妻乎媼驚云卽汪秀才耶曰然
前年此處看花者耶曰然夫人楊縣令之女名素蘭者耶問何
知其詳曰秀才適來時幾令婆子驚煞婆子若說明當令秀才
喜煞急詢云何媼指內曰適鳴鳴啼房中者是耶非耶晤詢果
不誣牛女邂逅驚喜非常乃留潘于媼囑好看承夜繼晨于前
村覓下澤車御女歸許溪時賊已僞安民遂誣吉成婚禮然孽
黨猶夜出掠得婦女無老幼妍媸囚一處曰姊妹館日久乏食
卽又出僞示令人自取贖或買爲婢妾素蘭羸弱不勝操作楊
夫人喜骨肉團聚于意外病頓瘳情隣叟爲賊之僞上官者入
城代買婢服掌珍役婢至夫婦大驚詫蓋卽荒村黑夜一面之
緝四姑也潘云自卽翠素姑偕婦之第二日李生果偵至甫慘
定賊猝集欲逃爲所擒索黃白物甚急告以無賊怒鞭無數媼

代緩頰卽并媼而斬之逼妾入姊妹館凌虐逾賤猖不圖重遇相對共悲嘆乞錄爲小星亦所甘也生正色云李卽死卿亦當爲渠作未亡人奈何有異志下方赧赧然而素蘭遽投袂而起撫牒而嘆曰天乎天乎報應彰彰乎妾無妬癖卿亦莫守腐局也請如四姑言順天心快人意聞若何女涕笑交集歷歷述當日遇李計陷逼好事下亦眦裂髮指曰夫也不良宜遭冥罰生反遜謝警懼曰士而無行可鑑前車卒不從其請數日後女酌生以酒微醺暗以已易下眠香衾生不知綢繆已女執燭自他室進苦茗生頗不自安曰僕非愛野鷺厭家雞爲卿所賺女笑曰妾能修蜀道通秦棧聞卿何如時賊氛猶未已也而生已儼然齊人矣

僕氏曰李生當其導彼姝走生路未必非一片惻隱心所誤

者荒村黑夜一轉念間耳幸碧翁慈悲早全其鋒刃畢命若覲
然人面坐視結髮人別抱衾裯一曲琵琶何堪入聽余詠秋雲
有句云十分世態人情險萬古天心巧樣多如瑣瑣者可謂巧
矣險足恃哉

捆仙索

淮安周木齋先生名寅善書嗜飲疎狂不羈性最喜參蛇床第
籬溷中無不蜿蜒拳曲相處爲常夏日先生怯暖兩臂所盤者
蛇腰際所圍者蛇赤足插藥中者亦蛇也否則膚燥欲裂襟煩
若燒寢食不安矣如有惡賓過訪先生談而厭之撒口一呼蛇
往全蠕蠕然蠢蠢然縷縷修修然登案繞榻客狂呼大奔往往
有驚破胆者先生尤喜作狹斜游然膩粉粗釵從無許可間有
稍稍雅潔者亦不過藏鈎賭枚博酒筵歡而絕不訂情時同遊

衆名士咸有髮暈先生每於花前月下笑人之忒愚而炫已之
善守衆因此妬嫉思設迷局以困之而士
法一日同集於
鸞情鳳想室先生適爲人家書碑版未踐約妖嬈環坐笙管嗽
嘈衆乘間告諸姬曰汝等豔冶均爲北里魁首色藝旣絕辭令
亦工當道王孫少年無不受惑周木齋亦猶是人耳并非鐵
心石腸何獨無法使彼香澤迷心一旦失足博我輩捧腹耶諸
姬聞之皆服其有操持不能媚之使墮落時末座一姬陳阿轉
字雙魚乃鹽阜新來者聞之獨以爲不難衆晚其姿僅中人而
斌媚中獨有一種清氣至絃索謳飲亦不能跨諸姬上輕之以
爲妄姬微嘆益自信衆戲之曰子如真能迷木齋一夕魂銷我
輩當贖二百金爲汝脫火坑姬稽首謝慨然曰君等丈夫量不
食言容婢子獨居一室十日不見客管教木齋夢魂顛倒耳倘

叨福蔭得踐所言當祇領雅贐拔我風塵衆曰若所言不應亦當受罰否姬曰如謬請罰婢子十日宴衆曰諾而木齋不知也姬於次日齋沐卸濃粧閉繡閣洒掃臥室清無點塵滿屋俱書劣畫一例刪除終日焚香枯坐如塑姬母本鹽城老妓也曾授以捆仙索蠱法姬不忍爲之自與衆名士約潛於床後闌一笏乾淨地搨筆畫木齋小像畧得神似訪其生辰甲子同黏於壁以繡針七根釘之因熒熒點孤檠夜靜披髮禹步對之拜呼其名甫六七日先生家居卽神搖魄蕩淫念經心每夕輒夢至一處與美人聚首談詩詞論書法無不當行醒而異之私告所契戚不能測至十日先生更坐臥無甯處往挈友人去訪翠一連三四家皆佯惡不能得歡心慰綺念尾至鸞情鳳想室諸姬咸至獨不見雙魚一一問訊皆非其偶客問曰君法眼亦太高耳

豈真巫山洛水仙子始爲雅伴耶曰吾亦不自解但一見若輩殊不生憐反爲惹厭因問諸艷豈盡於此乎曰尙有新來雙魚終日趺坐學觀音侍拉之來見高人或有緣耳須臾姬果珊瑚在門外亂頭粗服秋水瑩瑩入見先生凝睇多時始約略問姓氏無多言先生見姬則私衷大驚詫蓋姬卽夢中所見者也客對姬盛誇先生人品書法舉世無雙姬聞之卽褰衽拜曰婢子昔在海國卽聞先生名何圖於此處獲瞻雅範私衷慶幸何可名言先生大喜卽欲偃姬坐姬遠遠危立終不能近問姬香巢曰咫尺耳先生欲一瞻顧言已卽起微步心已急而足已忙矣姬攔止之曰公高人也下顧賤廬何可草草容婢子先去焚香掃地再迎玉趾先生不得已諭卽去炊許先生不能制止卽奔入大駭則室又夢中遊也見其清潔生虛白陳設更安妥毫無

奩具僅列法帖數卷和茗甌睡鴨而已問四壁何絕無懸掛曰
言之真令人齒冷婢子頑傲平生惟愛公法書入骨髓屢求不
得以致四壁如洗絕少排場耳先生立即遣僕市金箋宣楮爲
姬書楹聯條幅斗方雅簾十數件每一走筆姬輒辨其源曰何
神似蔡家父子也先生大呼以爲知己倏忽新月上先生勉強
興辭姬亦不甚留連已辨燈先生猶戀戀客慙慙曰以公才華
得雙魚妍慧真不啻朝雲之與東坡清娛之與司馬今夕爲天
孫下嫁良辰何可虛度先生遂開筵縱飲醉不能歸卽與姬繼
繼曰生平從未宿青樓今日爲卿破戒也明日姬設筵窮極水
陸召諸名士飲把酒曰婢子愚拙幸不辱命但婢子流落勾欄
良非素願未知公等能真發大慈悲否衆曰言猶在耳敢忘却
耶卽日出資脫姬籍姬出卽欲嫁先生衆譁先生有蛇癖意姬

不知待其入門怖而却走亦可博一笑詎嫁後獨不畏且伉儷甚篤先生鐫印文曰一生知已是雙魚時當道修城以千金浼先生書宴花樓贈僧門等字皆大司巡又雙魚典釵爲先生購大筆如椽一童子荷而隨之書成卽以此畫小像懸龕光閣下人有以捆仙索告先生笑曰雙魚不捆富貴人而捆我是以我爲仙也非知已而何

懷儂氏曰仙可捆乎想當然耳然而郎心難縛惟憑一線之情妾夢常牽早繫三生之足仙郎覲面神交久矣蓋仙人自捆非勅勒家真能捆仙人也嘗有宦者塵勞憔悴訪某高僧而稽首曰求大師解縛僧大聲曰誰縛汝慧業文人自當猛省

盈盈

天津衛爲輦轂下第一通衢每年大會商賈雲集必匝月而後

散邑有劉生名鐘字千石者貧諸生也美丰姿寡交遊非會文
不入城世居城外連柯里家貧以酒肆博瓊發生父恐其廢讀
倩生中表駱生司會計年二十尙未娶顧隣有富室張姓女盈
盈年相仿貌艷麗偶與團頭田二之母鄔氏閒話門首見生白
袷衣青絲履搖簞徐步過邸之秋波頻轉鄔窺測其意戲之曰
劉學究滿面包漿賴何福生此靈幃兒渠尙未婚若與姑姑配
鸞皇真一對玉人也女面頰微哂鄔又曰若酬老身十匹絹作
殮裝當代作冰無不諧女羞避之鄔亦撫掌去翌日其母携赴
戚家飲經會市惡少年爭擠暈之轉瞬迷惑不見母適道旁有
老嫗搭棚賣茶晚之賣油郎郭析子之母殷氏亦隣也急趨就
殷驚訝曰小嬌生何得獨行告以故曰險煞哉若遇匪攫去掌
上珠而母不痛煞耶母怖市散卽送之歸女坐轡後毀粧袖簪

珥面匿向壁不敢語少頃一男子來麻屨闊衫胸次毛如蝟目
耿耿轉與殷耳語而後去殷顧女曰煩姑姑代看小紅泥毋令
茶鼎沸我去去卽來女乘其不備急由棚後遁竄荒草中棘刺
連鉤血泔泔猶忍痛行時日已下春新月挂樹忽一少年來女
急伏草際睨之非他劉生也蓋會文歸晏取道捷徑較近耳女
急呼曰劉郎止步生固識女者驚詢何來告以故泣請導引遂
偕行女嬌喘流汗纖步挪移屢行屢仆顧生曰郎憎妾耶不然
何忍不一援手生告以瓜田李下女曰清夜男女同行誰信其
貞况妾遭患難非郎不知伊於胡底郎卽憎妾妾願以身報大
德生曰得卿爲婦素願也然貧富懸殊倚中變奈何女曰妾慕
郎風雅願奉箕帚中心藏之久矣邂逅卽天緣若中變惟有死
耳因泣下汎瀾生取袖中巾代拭淚曰深情已篆肺腑明日卽

央媒灼女索生巾報以玉戒指遂挽扶而行行至女家門首生
辭去女又遙囑之始叩門其母失女涕泣獨回頃正皇急聞叩
門聲啓之女也詢何往女詳告之且頌劉生德明日劉果遣媒
來求婚母聞女言已心德生益陰疑女遂詢女曰此兒終身事
毋至男滌器女當壚時始爲臨叩笑也曷慎之女曰是誠慈母
之珍愛然貧富有定數兒視渠骨秀神煥似非終老青衿者母
告於翁翁亦爲可遂許之從此生潔庭除備青廬女壓金線趕
嫁衣牽牛河鼓雖隔銀河均私幸鵲橋不遠矣詎田郎氏心憾
舉大小妮子賣却老娘自許婚姻迨得酬謝郭殷氏心憾好塊
肥羊肉業已入口竟自逃脫反成佳耦且妬且恨遂擬同作鴆
鳥以崇合歡鄔乘女他往往見其母曰大娘覓得乘龍佳婿饒
婆子來討喜觴飲但劉家下玉臺未日未鄔欲言又止母疑詢

之郎乃拍掌曰婆子幾忘却佛經云破人婚姻者墮拔舌獄母
堅詢之曰日受大娘好看願實不敢實此三寸舌盈姑富家女
受用慣渠家一碗薄粥尙不周且日從蕩婦眠頃有咯血疾然
則擲嬌女投火坑耶母晒之似不深信郎又厲聲曰大娘尙懽
懽耶前日母子相左者即渠挾同窗友將遂所欲耳母聞之大
怒曰大娘且勿怒以盈姑容貌何愁無金龜婿雀屏選婆子請
任之殷於其時亦往見生父曰阿翁近今何昏瞽驚詢之曰聞
賢郎聘張盈盈有之乎曰有曰聞外人云翁家夜掘窖得黃金
斗大有之乎曰無曰若是何遽聘盈盈渠貌如月中仙衣非錦
繡必磨擦嫩皮膚食非海味必擲碗作嬌啼偶抱小恙參苓費
萬錢且髮蓬蓬猶太憨生日逐家僮踢毬鬪虫耍子若娶作畫
中人看則可翁家貧無負郭田日博酒肆蠅頭利恐新婦到門

阿翁得噎逆就木矣翁問之大罵畜產即遣媒往以病辭其母
問媒曰其咯血疾乎媒漫應之益信遂毀議久之小婢洩其事
女啼哭不食日惟閉戶眠晨起母隔窗呼不應排闥入已梁上
三尺練自縊矣痛哭大悔恨盡以女之金玉釵釧納棺中殷聞
之稱快故市冥鏹往唁瞰含殮豐富歸與其子謀掘墓日既夕
啖以肴酒郭踏月荷鍤往掘席捲所有復擬剝殮裝女忽呻吟
轉側星眸乍啓櫻口欲舒大怖伏樹隙見女亭亭出棺外立而
旋仆知非走尸乃走出喚曰盈姑生乎女曰我如夢寐醒不知
何至此爾若負我歸當豐酬郭喜負之行中途哀告曰金玉在
我腰裏幸勿語高堂女曰我之得生賴子所爲方德之何肯洩
旣而謂女曰夜負女子行恐巡夜人見曷權就我母宿明晨送
之歸女勉應之聽柝聲漸近急用拳搗門不應握石擣之仍不

應心急舉足怒踢之門轟然倒入室不見母舉燭視之死矣蓋其母飲餘酒醉倚柴扉眠門倒正中其顙腦漿迸裂死郭謀於女故讐思曰我歸亦駭人聽聞曷卽嫁汝且有樽具在卽以葬汝母可乎郭喜卽煩女代候門忽忽負母尸去女瞰其去遠亦慢移蓮步煢煢獨行甫進村門見劉生素衣冠秉燭携紙錢拜於路側且哭且吟吟曰劉家有好女婉淑貞且痴兩心心暗許中道忽乖離空房鬼火暗匹練梁間垂卿爲我死我何生爲英臺慕華山繼翡翠巢鴛鴦圻何難相從地下化作雙雙雉子飛家有老烏頭已白不能從死中心悲女聞之大慟遽呼曰君前度劉郎耶妾生矣絃斷可續鏡復合真當畢方現影也生聞聲幾驚絕哭曰此父母成命毋怨小生女曰妾真復生生不信曰世上幾有返魂香卿欲效桂英若以小生爲王魁冤極矣女悽

側而前將攬生手而詳告之生急起狂奔女隨後哀喚不應抵家闔雙扉告駱曰盈盈爲厲言已手指外不能語駱聽之果有剝啄聲瞰之果有娉婷影遽於窗隙發火器轟雷一聲鬼影倒地意且爲響時田二正與小甲村外巡聞鎗聲疑邑宰出奔見女尸叩生戶駱晉之甲亦怒曰人命關天尙以青衿恐丐戶耶生出視之女正有形質復誤驚益哭田以爲怯扶之囑小甲往報宰自以蘆席覆女尸駱遁生亦入田肆無忌憚張燈獨取架上鹽豉熱簋舉酒獨酌恐復走尸以檀樹棒置座右霎時沉醉倚甕垂首眠其母鄔氏收生婆也頃從大家歸入門見子搖撼之田張目舉棒迎擊應手踣膝不辨伊誰仍拖蓋席下坐復飲醉復眠天明邑宰呵導來傳生候驗略審詰生涕泣直陳且求論抵了前生孽伍伯揭席報云頂顱骨裂乃木器傷非火器

端擊者保正視之曰此田郎氏也問生茫然傳田二則田猶在
醉鄉黑甜鄉中役喚之卽舉棍欲擊呼有鬼口張目瞪狀似中
邪宰怒答之始醒歷述劉生殺女狀且述走尸棍擊狀命自視
之母也大哭郭之隣又告伊母子不見門內有血跡請驗宰正
駭詫見郭析子鍾杪荷肴酒花燭含笑歸執之肩有血面沾土
詢伊母何往卽戰栗不能語忽張嬰亦携女來告女死復生殮
物被盜請驗掘之則郭殷氏之尸在焉訊女女涕泣直陳所以
且述畏郭強暴故以已函誘之始遁劉家遭發火器一震暈倒
魘卽回己宅矣其實未嘗死也張劉兩嬰均恍然悟共述兩家
毀婚之由皆兩媼蠱惑所致時觀者千餘人莫不吐舌宰顧大
衆曰報應昭昭絲毫不爽然兩逆皆誤殺母似可不必詳辦擬
杖斃抵之何如衆曰善遂伏法案結衆復叩請曰里號連柯美

人復活不圖於天津衛見之然兩家已毀婚乞宰官玉成怨曠
成就美譚宰曰諾卽命鼓樂花燭親視劉生行合巹禮而後返
署此近今事項幼平爲我言之

懊僕氏曰赤繩所繫雖雷轟炮擊有固結而不可解者何物惡
媼敢以鬼蜮而操與奪之權乎然旣殺其身又抵其子罪不及
孥冥冥之罰毋乃過與要之破人婚姻者乃鬼神所痛惡故照
常律而加一等然乎否乎爲之浮一大白

義僕琴軫

吾鄉曹生慷慨有大志苦聲妓馳駿馬其僕名琴軫者太翁生
時卽道伴幼讀以故年相仿而誼最重情更親也所居秋浦山
莊乃古之橫山縣故址生每策馬游四方琴軫負詩囊書笈隨
奔走暇猶爲生牧馬入巖谷倦每就苔茵石枕臥一夕馬齧草

四散琴正假寐忽覺耳畔有足音驚曉之則月滿中天澄澈如
畫萬籟俱寂松梢有烟俄來三五短髮童裝束頗大家青猿銀
屐狀挈酒尊果盒茗具茶鏝皆置極大磐石上妥貼無比乃互
相笑語曰今宵好風月無怪主人發清興邀嘉賓也一童曰宋
韓兩公終屬地主然則怕蓋東道僅以兩肩承一喙乎一童曰
禁聲防有耳屬於垣者又道吾輩慣忤客矣言已忽皆悚視曰
主人至旋一黃紫帔衣者掉臂徐步清瘦多髯雙眸炯若冠服
皆漢製趺坐石上撚鬚四顧英風颯然問童曰客何有約不來
一童跪白曰頃折簡致主人命客尙有楸枰半局未能決雌雄
想會卽至耳紫衣人領之旣而仰天太息搔首歛噓曰迢迢故
國或廢或興禾黍之悲能已已乎俄一白衣絳幘一黃衣青巾
者翩然應聲如鳥之飛至撫掌曰紀將軍高雅哉無故坐愁嘆

其爲吾輩貪此牧豬奴戲有負寵召乎曰非也江山大好觸景生愁然鄙人亦太不謹獨坐私語竟口吐國興二字犯宋將軍諱白衣人曰將軍瀟脫奈何亦墮世態如將軍諱信敝友韓君諱成取信成仁皆口頭禪是最易犯者能盡避之乎黃衣人曰友人名字本不當諱唐之李杜皆於詩句中互相稱名論詩者反賞其真而不議其疎也紫衣人捧腹大笑曰君等妙舌不可不借濁酒一澆於是席地圍坐角飲甚豪黃衣人忽擬高唱以貶銀曠白衣人阻之曰武人覓句雖新奇而終嫌生硬矧吾輩所習者皆七絕句君亦知紀將軍生時尙無小秦王調乎紫衣人曰不然僕近遊六合內外偶經鎮獄見唐人磨崖句頗羨其搖曳君如高詠僕定效顰請卽命題白衣人曰可各徵囊日撒手時情景直寫代簪絃狂歌抒憤懣何如曰善同請紫衣人首

倡臺不推遜滿浮一杯吟曰榮陽血戰過重瞳假豎降旗替赤
龍史不書名功不錄賴他公論有髯翁白衣人曰將軍古節可
裂金石矣已亦吟曰南臺隨蹕萬英豪誰捨頭顱喪寶刀梁底
捐軀臣子分笑他預賜白龍袍黃衣人吟曰願擲西江脫紫緋
登時御艦出重圍纔知河伯來稽首身有鵝黃帝主衣紫衣人
擊節再四泣下沾襟曰僕前謁張館君過古紅邑見韓君祠宇
尙凜凜有生氣也忽嶺首有三丈夫皆青衣聯臂踏歌步月而
來見飲者遽側足立側目視屏息甚恭黃衣人笑曰我輩豪情
方謂無兩何圖中夜尙有此同調也呼三丈夫問姓氏年邁者
曰張威壯年者曰胡世富少冠者曰王秋白衣人喜曰吾桑梓
也耳名久矣遂以三丈夫事蹟刺刺告兩人紫衣者大喜呼與
共坐遜再四曰吾輩厮養卒何敢於上將前稱揖客曰貴賤雖

殊忠義則一旣脫塵埃何判低昂皆識神仙不入勢利場也堅
乞坐譚遂拜而後坐更添七壘再進醇醪飲數巡冠者量猶豪
紫衣人甚欣賞命步和前作三人謝不能曰第信口道出自得
天籟三丈夫遂聯句邁者曰搖洞魂飛日山花慘不春風雲纓
觸戰壯者曰蠶粥秃才貧志比當熊壯冠者曰功殊飼虎仁皮
膚成藥樹邁者曰血肉裹苔茵劍舌拚奴子壯者曰刀頭救主
人命拋阿堵物冠者曰職本股肱臣吟至此苦不能續紫衣人
卽續之曰賤莫嗤臧獲忠能泣鬼神白衣人曰井桃僵可代黃
衣人曰同不愧天倫吟罷前峯佛寺晨鐘遽鳴古店荒村鷄唱
四起一時颺散人物全無惟聞空際呼曰得暇仍集于此耳琴
驚駭痴迷如夢方覺視馬猶齒草風飄飄蕭急控之回詳告曹
生生曰異哉子何遇之奇也紫衣者漢之紀信曾代漢高祖死

白衣者明之宋國興黃衣者虹縣韓成均代朱太祖死青衣者
張威爲明僉事張昊僕昊征姚元洞蠻力盡被執昊預遺威道
威不聽賊刃昊威力拒之曰先殺我賊怒支解之胡世富明秀
才崇應第僕客出遇盜被執索金世富給之曰金在我處執彼
何爲應第得脫賊索金僅空囊怒撻割之王秋明王應芬僕游
粵嶠應芬病不起秋日夜禱于神願以身代無效卽抽刀割臂
肉和藥進芬愈而秋竟以勞頓死之數子者生前氣貫日星死
後神遊山嶽而子能親瞻風範細聆緒譚亦何其幸歟琴聞之
淚雨滂沱悲不能止明年曹生中鄉魁當道者以生才幹薦爲
某縣令適齊王氏作亂曹捧檄解軍餉軍火均無誤名登剡章
者屢矣一日又押解赴行在所乘馬名紫撥叱省中途遇流矢
中之殪生悲悼葬以帷蓋爲文以祭之易數馬皆不及紫撥叱

之便捷時時扼腕意態頗唐道出桃花店遇管妓小青惑之繼
繼四五日不發琴跪陳泣勸亦不聽琴不得已私繫小青乘郊
野云已遁去曹生始行比至經略果大怒坐違限按軍法腰斬
曹詣轅門交兌訖已出就館舍小休息琴見每次皆領小紅旗
出是旗獨黑知有變閉戶告曹曰主亦知僕之事主猶臣之事
君子之事親歟君父有難血性兒何敢偷生小人前在橫山牧
馬夜見古之盡忠替主者六人今主將不測安知非鬼神預示
警于某乎曹愕曰何遽至此曰主人尙憐憫耶言未已聞叩門
聲甚急琴忽忽藏主于別室自更衣冠開門挺出大言曰
我解糧官曹令尹爾輩誼誼將何爲來者五花倫子也應聲曰
經略有令着令尹歸天卽攜下級而斬之腰斷矣倫子去曹潛
出脫之見碧血滿地琴之上半截尙生以兩手爬至主前口齧

其靴腔目凝淚曹泣曰吾累汝矣吾生還葬爾入祖域囑子孫
世世祀爾於家廟爾心甘乎琴齧靴不肯釋曹泣曰吾歸當改
過爲善從此冷宦情絕聲色爾心慰乎琴極力出聲曰唉口釋
目遽瞑至今吾邑曹氏尙祀之如祖禰云

慎農氏曰嘗讀孝經知天子諸侯大夫有諍臣士有諍友若琴
軫者敢以義僕例之哉直士之諍友天子諸侯大夫之諍臣耳
觀其尸判爲兩猶復瞠目凝淚口吐哀音唉之一聲真能使天
地含愁鬼神痛哭輜軒史氏當採入忠義傳以愧世之不能爲
諍友與諍臣者

以癩寄烈

江西王官慶儒士也娶彭氏女爲勝國彭殿撰文憲公的紹仲
伉儷稱靜好焉生屢蹶童子軍彌發憤下帷遂膺咯血疾女屢

昴生曰夫子千金之軀何必定以佔呬爲出頭地臨出心肝身將殞矣名何寄乎所珍重生善其言終不易其志久之益不支病劇彌留時女嗚咽訊生曰妾奉父母命爲夫子侍巾櫛甫一紀卽百年君舍妾去又無子女將何以處妾也生已口噤牢牢執女手挽袖者三示以必守生旣卒女擇姪繼生後送就窆窆歸卽發狂痛而哭哭暈且醒醒則又哭進食不食值眠不眠人有慰勉者卽雉經救之免又升梯踏危樓墜而不死臥竈下翅足對司命哭且詈人有止之者卽詈人從此晨夕詈而哭門內外皆厭惡不與較卽往哭於亡者墓墓側有穴深尺許以頭鑽入人扶之出披髮面沾土目灼灼如鬼彘則人憐繼則人惡至是人則笑矣昇之歸則以朱墨塗面作罔兩古豪俠諸怪狀又傅粉作董妖嬈趙飛燕諸艷狀哭更歌歌復哭夜又服亡者服

履亡者履作夫歌嘯咳唾讀書諸聲與綠窓唧唧病榻呻吟諸聲忽放聲號咷聲震隣壁孤燈明滅幽靈若來忽又笑聲盈耳似與人語總帷搖動淒風自生家人恐其顛癩乃扃於一室自牖進飲食隔壁竊聽蓋無晝無夜不鼎沸於其間也浹旬姑絕食以試其變而聲如故一夕聲頓止月明如水萬籟淒清隣人一媼一女見女環珮珊珊走出門外翹首望清輝微微太息問之不語驚告其家家人曰扃如故也視門外已杳啓門燭之則跌坐空床如老佛入定狀婢子捫之則膚已冰矣衆大嗟歎始知向非顛乃以顛寄烈也彷彿遙空珮聲猶響

懊儂氏曰箕子佯狂忠也大舜號泣孝也彭儒人歌哭叫罵怪怪奇奇烈也可鼎足矣人當無可奈何之際呼天不應呼地不靈的有此等境界其身窮其遇慘欲已已庸可得乎鄒君維生

記之余并記之

千秋冥吏

吾鄉城隍司神最著靈顯由於香火之盛人心之見敬也然最奇者則莫如道光初年鄉父老所傳一事道官楊麗源爲廟住持一夕已就枕忽聞廟庭鼓吹呵殿排衙數人小語云新官少年科甲氣度不凡非同舊令之腐頭巾須各敬其事毋干犯也俄而鑾鼓升座按卯唱名楊自樓窓紙隙偷睨果見一少年官入衣本朝冠服珊瑚頂孔雀翎風儀秀美高坐受朝恭旋去傳宣掩門執事者咸魚貫出景物俱杳燈火亦稀知爲新城隍甫莅任秘不敢言月餘揚州賽都天神會魚龍曼衍士女如雲爲東南第一勝會時平山堂牡丹盛開遊人坐至凡看會回者必順詣山堂看花且肆憑眺住持僧往來迎送無甯暑衣服寒素

者聽自遊覽華麗者殷勤款留中等客有客堂師晉接上等客始得方丈道隨通例也至是忽來一貴客無侍從無車馬而袍服炫爛器宇軒昂覺竟日所來之裙屐少年更無能出其上者知客恐當道貴人故微行偵事實遂飛告方丈倒屣恭迎邀至正廳稽首下拜客殊傲慢恣于周旋僧更恐以上等茶果進客畧啜香茗而已僧足恭問鄉貫姓氏笑不答時揚州操雅者甚夥雖鹽賈木商亦復對花吟詠僧捧箋磨墨索貴人錦句爲寒剡增輝客亦不却走傍雕闌對花略一惆悵即揮毫如飛成一小令尾押玉印不署姓名僧益驚堅留素膳笑遣之已而仰天微粲曰日下春矣乘興而來其興盡而返乎笑擲白鏹五兩與僧詭云辭謝客亦笑不顧僧急以竹剪取半放極大之牡丹奉客曰此大富貴也客受而持之且嗅且行僧偕大衆披袈裟送

出門伏地連叩比仰首視客已邈邈向西去途遇推下潑空車者問曰我欲回天長爾曷送我當不吝償車夫云天色晚矣明晨可到今宵權止大儀宿曰汝第送我何計及遲速耶車夫曰昂其值曰是須大錢二千文曰諾登車西返倏如電掣如風馳如箭之離絃車夫惟覺兩足如飛不能制止頃刻見天長雉堞已在眼前各家店鋪時甫篝燈車夫詫曰曠到矣何其速也問貴人水陸舍館何處曰城隍廟比至廟前客始下車拂衣上牀整巾步入回顧曰汝可鵠候當遣送汝值言訖不見車夫候之久不見其出黑摸索行至東房即楊師煉丹室問廟傭無其人詎辭駭詫喧呶不休楊知有異詢告以實楊曰咄子瘋癲作何抑有縮地法耶日墮始發頃即抵吾邑耶車夫愕然久之如夢初醒不知所云攜憶其手折牡丹一枝鮮妍欲滴遂又告楊楊

呼燈持鎗偕車夫詣寢宮神座前視香爐內果有玉樓春一枝
爐側列青蚨兩貫遂深信車夫所言爲實車夫曰是也花在此
人潛何處耶揚喝止之告以神最靈願慎毋多言現有賞錢可
叩頭如數祇領車夫再拜荷錢出明晨盡以神賞市香燭甲馬
虔詣神前禱告自云鄉愚盲雙目不能辨神祇賞賜萬不敢領
焚謝訖神慢內鏗然又擲出青蚨如前數楊勸之曰且去神不
負汝勞也年餘又來一畫士池春草者東浙人畫山水入神品
畫馬尤佳顧生性孤介喜居冷境不近熱場下榻于廟之東房
敞寢宮之別妖樓極幽寂堅欲請爲畫室楊不可池懇之再三
始携筆硯入反扃其戶竹爐茶竈吮毫自如時正小春池方伸
紙遣墨忽覺已之身後有美男子冬貂袍帽珮玉鐙鐙負手凝
神靜窺池畫池驚入目疑爲縣署幕賓起立讓坐客殊不答移

步環視壁端所懸已成之幀旋顧池鴈色曰觀君墨妙亦是高
人外間隙地甚多到處染翰何事定走入長官閨闔耶言已頓
杳池大駭趨出視戶扃如故驚訊黃冠咸云是本不可強居者
曷遷徙爲宜池雖出然心尙以神人贊歎爲榮齋沐恭繪屏幅
摺疊數事再拜肅呈是夜夢神來告曰旣承雅贖但幽明珠途
焚之始得區區不腆聊爲足下一潤彩筆言已笑擲一物墮床
頭驚醒摸之果得朱提二十餘兩其靈顯又若此明年楊有事
揚州親詢山僧曰誠有之錦句尙在紗籠中也楊讀其詞曰天
涯芳草傷離緒竹西自古繁華誤國色天香含風帶露名花合
在銷魂處憑高指遍南朝路隔江點點春無數有限春光無端
淚雨山僧那得知其故薰調寄七娘子也筆蹟秀麗如趙松雪
尾押小印爲千秋其吏四字良由吾邑爲唐時下阿村千秋縣

故址至第五年有鄉人生爲勾魂使者時過陰司云神貌果如
所說頃已卓異升授鳳陽郡城隍然乎否乎惟詞句芊綿的真
蘇辛小令不可不傳